

重編張仲景傷寒論證治發明溯源集

重編張仲景傷寒論證治發明溯源

虞山錢

男 格壽平

訂

門人曾 銘繹三

大陽中篇

傷寒證治第二

傷寒正治

太陽病。或已發熱。或未發熱。必惡寒。體痛。嘔逆。脈陰陽俱緊者。名曰傷寒。一

前總脉總證中。已先並舉中風傷寒所同有之脉證矣。而尚未分其何以爲中風。何以爲傷寒也。此篇即於篇首脉浮頭項強痛之總脉證中。又增入已發熱未發熱。惡寒頭痛嘔逆。及脉之陰陽俱緊。以別其爲傷寒所現之脉證。有如此也。傷寒者。寒傷營也。營在衛內而屬陰。寒本陰邪。其性鋒銳。故深入而傷營也。寒邪入腠。玄府緊閉。陽氣不得發泄。未有不鬱而爲熱者。此言或已發熱。或未發熱者。言其發熱之候。雖有或早或遲。而皆必惡寒體痛嘔逆也。稱惡寒而不

言惡風者。以寒傷營而言也。下文雖有惡風無汗之條。蓋以營衛表裏相連。寒邪由衛入營。營傷則衛必先傷。是以亦惡風也。體痛者。寒傷營分也。營者。血中精專之氣也。血在脉中。隨營氣而流貫滋養夫一身者也。生氣通天論云。聖人陳陰陽而筋脉和同。氣血皆從。此因寒邪入於血脉之分。營氣滯而不快於流行。故身體骨節皆痛也。嘔逆。氣逆而嘔也。胸膈爲太陽之區界。邪在胸膈。故氣逆而爲嘔也。然各經之嘔不一。唯惡寒發熱脉緊無汗之嘔。則爲太陽之本證。

也。當以各經之兼證別之。則自分矣。如傷寒嘔多。雖有陽明證。不可攻之。蓋以太陽表證未去。亦屬太陽之嘔也。若發熱無汗之傷寒。嘔不能食。而反汗出漉漉然者。是轉屬陽明之嘔也。又如食穀欲嘔者。屬陽明也。又若嘔而往來寒熱者。屬少陽之類是也。脉緊者。如索之緊絞也。脉經謂緊與弦相類。辨脉篇云。弦者。狀如弓弦。按之不移也。緊者。如轉索無常也。脉陰陽俱緊者。言取之浮候固緊。而按之沉候亦緊也。前中風為陽邪。所以僅傷衛分之陽。故陽浮而陰弱。此

以寒邪鋒銳。深入營分。寒邪由衛入營。營衛俱受傷。故脉之陰陽俱緊也。病機十九條云。諸寒收引。皆屬於腎。腎與膀胱相為表裏。故寒在太陽而脉緊也。緊則為寒氣所傷。故名之曰傷寒也。然非獨冬令為然也。六氣之變。四時皆有之。特以冬月為多耳。以下凡稱傷寒而用麻黃湯者。皆同此脉證也。以寒傷營為第二層。故以之為太陽中篇也。

辨誤 夫寒雖六氣之一。實冬令嚴寒肅殺之藏氣也。天地之陽氣。自春令上升。出地而發生萬物。至夏

今而暢茂盛長矣。盛極當衰。故行秋令以收斂成實。是為西成。既成則有冬氣以藏之。又為來春發生之根本。故冬藏之寒氣。乃天地萬物成始成終之正氣。所以不可傷。傷之則為病矣。然何以傷之即病乎。蓋天地之陽氣。至十月則陰氣已極。卦屬純坤。十一月而一陽生於盛陰之中。在卦為復。其象為坎。一陽居於二陰之中。以寒水為之胞胎。涵藏深固。潛養初陽。所謂潛龍勿用也。待漸長出地。而為東震發生之主。故其卦為泰。乃立春之候也。至二月而陽氣始壯。透

地上騰而爲風矣。由此天造草昧之時。而雷霆風雨。萬物化生。草木條達矣。若傷其寒水之胞胎。則藏陽損泄。至春而不能暢達。則六氣不時。旱澇不均。饑荒荐至矣。人身以腎爲冬藏。命門之真陽。藏於兩腎之中。即坎卦之象。乃太極中涵藏之元氣也。爲生氣之本。三焦之原。一陽藏於兩腎寒水之中。潛養固密。則元陽充足。然後清陽之氣。升越上騰。蒸穀氣而外達。則爲衛氣。遊一身而布化。則爲三焦。若此火損傷。則三焦無以布其陽氣。上焦無此。則耳目失其聰明。中



焦無此。則水穀不能運化。下焦無此。則氣化不得流行。二陰之竅不利。況不能蒸騰其慄悍滑疾之穀氣。以外衛皮膚。致腠理不密而風寒溫暑之邪。乘虛而中之矣。故曰冬傷於寒。春必溫病。此內經言未病之前。先傷於寒也。所謂冬傷於寒者。言傷其冬臟主蛰封藏之本。寒水不能固養其元陽。以致三焦肝膽之陽氣不旺。不能敷布其陽春生發之衛氣。使腠理不密。玄府空疎。外邪得以襲之而成溫也。至若此篇之所謂傷寒者。乃仲景專指寒邪侵入營衛。鬱於腠理。

之間。陽氣不得發泄。惡寒發熱之外邪。已病之傷寒也。叔和不曉陰陽。未達至理。軒岐之旨罔窺。仲景之玄未悟。妄以內經之冬傷於寒。認爲仲景之傷寒。不分已病未病。不辨先天後天。遂引內經冬傷於寒。以證仲景論中傷寒二字。究不能解冬傷於寒。因何直待春令而始溫病。又不能解熱論所云。凡病傷寒而成溫者。先夏至日者爲病溫。後夏至日者爲病暑。以旣感之寒邪。何故肯遙隔半年三月。然後發動。想其下筆之際。必大爲扼腕。不得已而強爲一說曰。不即

病者。寒毒藏於肌膚。至春變為溫病。至夏變為暑病。若寒邪果肯安然久處於肌膚。則內經玉機真臟論中之風寒客於人。使人毫毛畢直。皮膚閉而為熱之說。豈反為虛語耶。自有叔和之說。而千古之惑。從此始矣。不意唐啟玄子王冰。亦不察其誤謬。遂於素問陰陽應象論中。各傷於寒句下。引此數語以作註腳。又因此而使天下後世之人。皆認為經文之本意如此。莫識其為叔和之謬語。視之不當若鼎鐘銘勒之文。金石不磨之論。悉崇信之而不疑。動輒引之以為

證據。無論智愚。鮮有不陷溺其說而入其彀中者矣。余四氣之旨。詳載在素問生氣通天論。及陰陽應象論註中。此篇不及具載。僅畧舉其一端。以辨傷寒二字之疑似。爲千古之說耳。

太陽病。頭痛發熱。身疼腰痛。骨節疼痛。惡風。無汗而喘者。麻黃湯主之。二

上條雖具脉證。以正傷寒之名。而傷寒之證。猶未備也。故於此條補出諸證。併出其主治之法也。其於兩條中互見者。蓋示人以傷寒之見證。非必悉具。亦或

有不齊也。邪在太陽。必頭痛。前雖見之總證。而本條猶未見也。故仍補出。曰身疼腰痛。骨節疼痛者。所以分疏上文體痛之義。至真要大論云。諸寒收引。皆屬於腎。腰者。腎之府也。骨者。腎之所主也。腎與膀胱。一臟一腑。相爲表裏。且足太陽膀胱之經。夾背脊而行於兩旁。邪在太陽。故腰痛骨節疼也。惡風雖或可與惡寒互言。然終是營傷衛亦傷也。何則。衛病則惡風。營居衛內。寒已入營。豈有不從衛分而入者乎。故亦惡風也。無汗而喘者。肺主皮毛。寒邪在表。內通於肺。

邪氣不得發泄。肺氣不宣通。故無汗而喘也。寒邪非汗泄不解。故以麻黃湯主之。

### 麻黃湯方

麻黃

三兩  
去節

桂枝

二兩

甘草

一兩

杏仁

七十箇  
去皮研

右四味。以水九升。先煮麻黃減二升。去上沫。內諸藥。煮取二升半。去滓。溫服八合。覆取微似汗。不須啜粥。餘如桂枝法將息。

麻黃氣味輕薄。辛溫發散。肺經開鬼門之專藥也。杏仁苦辛。滑利肺氣之要藥也。仲景治太陽傷寒。皆用

手太陰藥者。以肺主皮毛故也。用甘草者。經云。寒淫所勝。平以辛熱佐以苦甘是也。一劑之中。唯桂枝爲衛分解肌之藥。而能與麻黃同發營分之汗者。以衛居營外。寒邪由衛入營。故脉陰陽俱緊。陽脉緊。則衛分受傷。陰脉緊。則邪傷營分。所以欲發營內之寒邪。先開衛間之出路。方能引邪由營達衛。汗出而解也。故李時珍本草發明下云。麻黃乃肺經專藥。故治肺病多用之。張仲景治傷寒無汗用麻黃。有汗用桂枝。歷代名醫解釋。皆隨文傳會。未有究其精微者。時珍

嘗思之。似有一得。與昔人所解不同。夫津液爲汗。汗即血也。在營則爲血。出衛則爲汗。夫寒傷營。營血內濇。不能外通於衛。衛氣閉固。津液不行。故無汗發熱。而憎寒。夫風傷衛。衛氣受邪。不能內護於營。營氣虛弱。津液不固。故有汗發熱。而惡風。然風寒之邪。皆由皮毛而入。皮毛者。肺之合也。肺主衛氣。包羅一身。天之象也。證雖屬乎太陽。而肺實受邪氣。其證時兼面赤。怫鬱。欬嗽痰喘。胸滿諸證者。非肺病乎。蓋皮毛外閉。則邪熱內攻。而肺氣積鬱。故麻黃甘草。同桂枝引



出營分之邪。達之肌表。佐以杏仁。泄肺而利氣。是則麻黃湯。雖太陽發汗重劑。實為發散肺經火鬱之藥也。潁湖此論。誠千古未發之秘。奈何前輩。見仲景用之以發太陽之汗。遂以為足太陽藥。又以麻黃為發汗之藥。桂枝為固衛止汗之藥。若桂枝果能止汗。仲景豈反用之以助麻黃而發汗耶。後人有用麻黃而監之以桂枝。見節制之妙。更有馭六馬而執轡唯謹。恒虞其泛軼之說。豈理也哉。

脉浮者。病在表。可發汗。宜麻黃湯。三

脉浮而數者。可發汗。宜麻黃湯。四

此二條。所以申脉浮及浮數者。亦可發汗。不必皆緊脉也。按脉法。浮則爲風。緊則爲寒。脉浮惡風自汗者。當用桂枝湯解之。脉緊惡寒無汗者。當以麻黃湯汗之。中風用麻黃湯。則爲誤汗。傷寒用桂枝湯。尤爲禁劑。此條以脉但浮而曰可發汗。宜麻黃湯。豈仲景之誤耶。以理測之。脉雖浮數而不緊。必有惡寒體痛無汗之見症。故以麻黃湯發汗也。若脉浮而數者。尤似乎脉浮而動數之太陽中風矣。不知已發熱之傷寒。

其脉亦可浮數也。但察其所見之證。有惡寒無汗等證。則仍是寒傷營也。然脉既浮數。則鬱熱之邪猶在表。經云可汗而已也。故曰可發汗。宜麻黃湯。

辨誤 寒邪在表則脉浮。已發熱者則脉數。此其常也。因上文有陰陽俱緊之脉法。然寒邪在表。亦可浮緊。恐人拘泥。故又申此二條。以明傷寒脉浮及浮數者。亦可用麻黃湯。但以有汗無汗別之可也。註家俱因仲景有脉數急者為欲傳句。遂謂乘其欲散而拓出之。散其數而不令其至於傳。後人因之。又巧為之。

說曰。乘其勢正欲傳。用麻黃擊其半渡而驅之使出。以理推之。恐不必作如是解。

傷寒一日太陽受之。脉若靜者爲不傳。頗欲吐。若燥煩。脉數急者爲傳也。五

傷寒一日太陽受之者。即內經熱論所謂一日巨陽受之。二日陽明受之之義也。因太陽主表。總統營衛。故先受邪也。然寒傷營之證。其脉陰陽俱緊。或見浮緊之脉。若一日之後。脉安靜恬退。則邪輕而自解。不至傳入他經矣。倘見證頗覺欲吐。則傷寒嘔逆之證。

猶未除也。況吐則邪入犯胃。乃內入之機。若口燥而煩熱。脉數急者。為邪氣已鬱為熱。其氣正盛。勢未欲解。故為傳經之候也。

傷寒二三日。陽明少陽證不見者。為不傳也。六

二三日。熱論所謂二日陽明受之。三日少陽受之也。然未必太陽之邪。必先傳陽明。而後傳少陽也。或入陽明。或入少陽。未可定也。若以常法論之。則二日當傳陽明。三日當傳少陽。若一三日陽明少陽證不見者。是邪氣止在一經。故為不傳也。

傷寒失治

太陽病。脉浮緊。發熱身無汗。自衄者愈。七

浮緊。寒傷營之脉也。發熱無汗。寒傷營之證也。自衄。鼻血自出。言失治而至於自衄也。傷寒之脉證既具。自當發其汗矣。蓋汗爲營血之所化。陽氣鬱蒸而使陰液外泄。則營分之寒邪。隨汗外泄而解矣。身既無汗。營邪不得外泄。鬱熱傷營。迫血妄行。從鼻竅而出。熱邪亦得隨血外泄而愈也。血猶汗也。汗即血也。血與汗。皆能泄營分之邪。故自衄者愈。

傷寒脉浮緊。不發汗。因致衄者。麻黃湯主之。个

此重言以申明上文之義。言上文所謂脉浮緊。發熱身無汗而自衄者。蓋失之於先。以不發其汗。熱鬱營血之中。因而致衄耳。若見其脉浮緊。即知其寒邪在表。當即以麻黃湯汗之。則邪隨汗泄。不至鬱熱傷營。逼血上行。致傷陰分矣。故當先以麻黃湯主之。則不至於衄也。

太陽病。脉浮緊。無汗。發熱。身疼痛。八九日不解。表證仍在。此當發其汗。服藥已微除。其人發煩。目瞑。劇者必衄。

衄乃解。所以然者。陽氣重故也。麻黃湯主之。九

此又承上文言。雖服藥而未得盡除。併詳其致衄之漸。又推原其所以然之故也。言邪在太陽。脉浮緊而無汗。發熱身疼痛。不早發其汗。至八九日之久而不解。猶未陷入於裏。而表證仍在者。此等仍當發其汗。若服解表藥已而病微除者。非藥力輕薄。不足以汗去其邪。即汗不徹而邪不得盡除也。邪之所除既微。則留邪甚盛。鬱而不泄。所以發煩眩冒而目瞑也。其邪氣之劇者。必至鬱熱傷營。陰受煎迫。血熱上行。從



臯竅而衄矣。衄則熱邪上越，乃得解也。原其所以然者，以寒邪在太陽之表，陽今鬱熱之邪氣太重故也。陽邪既重，則從前發汗時，當以麻黃湯主之，邪可盡除，不至發煩目瞑，直待衄血而後解矣。

辨誤 條辨以風為陽邪，寒為陰邪，泥為定法，故以浮緊身疼無汗屬傷寒，以陽氣重句屬中風。又以發煩為風壅，目瞑為寒鬱，謂衄後風邪已解，而寒性沉滯，須以麻黃湯發之。尚論遂因之以立說，亦謂此乃風多寒少之證。陽氣重者，風屬陽而入衛，為寒所持。

雖得衄解。仍主麻黃湯。以發其未盡之沉滯。兩家俱以此三條入太陽下篇。以爲風寒並感之證。誤矣。豈知風寒之本性。雖有陰陽之分。而其中人也。無論中風傷寒。在陽經則爲陽邪。入陰經則爲陰邪。此條雖屬寒邪。已鬱而爲熱。又在陽經。故曰陽氣。非指中風之陽邪爲陽氣也。如果是風寒並感。則當用桂枝麻黃各半等湯。及大青龍湯矣。何故獨以麻黃湯主之耶。若云衄後風邪已去。不必桂枝解肌。所以獨用麻黃。則去道遠矣。仲景本云表證仍在。當發其汗。又以

服藥不能盡除。以致發煩目瞑。至衄血乃解。又恐後人未達其旨。而又原其所以然之故。以陽邪太重。輕劑無益。當以麻黃湯汗泄其邪。則不至邪鬱不伸。發煩目瞑而衄矣。非謂衄後可更用麻黃湯也。若衄後可用。則禁汗例中。惡得有衄家不可發汗之戒乎。且前條已有自衄者愈。並不主之以麻黃湯。次條有不發汗因致衄者。方云以麻黃主之。義自明矣。何庸二三其說耶。

傷寒脉結代。心動悸者。炙甘草湯主之。十

傷寒而見結代之脉。則知其真氣已虛。經血枯瀆矣。氣虛則流行失度。血澀則脉道不利。故脉見結代也。五藏生成篇云。脉之合心也。脉要精微論云。脉者。血之府也。心為藏神主血之臟。因氣血虛衰。心神搖動。氣餒而惕惕然悸動也。此為陰陽並虛。法當氣血兼補。故以炙甘草湯主之。

炙甘草湯方

甘草

四兩  
炙一

生薑

三兩

桂枝

三兩

人參

二兩

麥冬

半升

生地黃

一斤

阿膠

二兩

麻仁

半升

大棗

十二枚

右九味。以清酒七升。水八升。先煮八味。取三升。去滓。內阿膠。烱化盡。溫服一升。日三服。一名復脉湯。

此方以炙甘草為君。故名炙甘草湯。又能使斷脉復續。故又名復脉湯。甘草生能瀉心下之痞。熟能補中氣之虛。故以為君。生薑以宣通其鬱滯。桂枝以暢達其衛陽。入大棗而為去芍藥之桂枝湯。可解邪氣之留結。麥冬生津潤燥。麻仁油滑潤澤。生地黄養血滋陰。通血脉而益腎氣。阿膠補血走陰。乃濟水之伏流。

所成。濟爲十二經水中心除水。猶人身之血脉也。故用之以導血脉。所以冠氏本草云。麥冬地黃阿膠麻仁。同爲潤經益血。復脉通心之劑也。人參補元氣之虛。同麥冬又爲生脉散之半。更以清酒爲使。令其宣通百脉。流行血氣。則經絡自然流貫矣。藥雖平和。觀其斤兩之重。升量之多。分兩之法。雖有古今之異。然較之他方。已不同矣。今人以一錢二錢。及幾分作劑。日飲一服。而欲求其即効。庸可得乎。

脉按之來緩。而時一止復來者。名曰結。又脉來動而中

止更來小數。中有還者反動。名曰結陰也。脉來動而中止。不能自還。因而復動。名曰代陰也。得此脉者必難治。此一節。所以申上文結代之義而析言其狀也。緩者。脉來四至而軟弱寬緩也。乃緊脉轉索絞急之對稱。非若遲脉之三至及三至半也。結者。邪結也。脉來停止暫歇之名。猶繩之有結也。凡物之貫於繩上者。遇結必礙。雖流走之甚者。亦必少有逗遛。乃得過也。此因氣虛血滯。邪氣閒隔於經脉之間耳。虛衰則氣力短淺。閒隔則經絡阻礙。故不得快於流行而止歇也。

動而中止者。非辨脉法中陰陽相搏之動也。謂緩脉正動之時。忽然中止。若有所遏而不得動也。更來小數者。言止後更勉強作小數。小數者。鬱而復伸之象也。小數之中。有脉還而反動者。名曰結陰。何以謂之結陰。辨脉法云。脉來緩。時一止復來者。名曰結脉。脉來數。時一止復來者。名曰促脉。陽盛則促。陰盛則結。此皆病脉。以此觀之。則此條乃脉緩而中止。爲陰盛之結。故謂之結陰也。代。替代也。氣血虛憊。真氣衰微。力不支給。如欲求代也。動而中止句。與結脉同。不能



自還。因而復動者。前因中止之後。更來小數。隨即有還者。反動。故可言自還。此則止而未即復動。若有不復再動之狀。故謂之不能自還。又略久復動。故曰因而復動。內經雖有數動一代者。為病在陽之脉。而此則從緩脉中來。為陰盛之脉。故謂之代陰也。成氏謂結代之脉。一為邪氣留結。一為真氣虛衰。即脉要精微論所謂代則氣衰者是也。上文雖云脉結代者。皆以炙甘草湯主之。然結為病脉。代為危候。故又有得此脉者必難治句。以申明其義。蓋脉者。陰陽氣血之

所會。隨呼吸而至者也。故靈樞五十營篇云。一呼脉  
再至。氣行三寸。一吸脉再至。氣行三寸。一呼一吸爲  
一息。脉四至而氣行六寸。積十息而氣行六尺。積至  
一百三十五息。脉行八丈一尺。漏下一刻。日行十分  
六釐。積至二百七十息。脉行一十六丈二尺。氣行交  
通於中而一周於身。漏下二刻。日行二十分零。至一  
萬三千五百息。氣行五十營於身。水下一百刻。日行  
二十八宿。漏水皆盡而脉度終矣。根結篇云。五十營  
者五藏皆受氣。持其脉口。數其至也。五十至而不一

代者。五藏皆受氣。四十動一代者。一藏無氣。三十動  
一代者。二藏無氣。二十動一代者。三藏無氣。十動一  
代者。四藏無氣。不滿十動一代者。五藏無氣。予之短  
期。要在始終。所謂五十動而不一代者。以爲常也。以  
知五藏之期。予之短期者。乍數乍踈也。經義如此。故  
曰得此脉者。必難治。

傷寒禁汗

脉浮緊者。法當身疼痛。宜以汗解之。假令尺中遲者。不可發汗。何以知之。然以榮氣不足。血少故也。主

浮緊。傷寒之脉也。法當身疼腰痛。骨節疼痛。宜以麻黃湯汗解之。爲是。假若按其脉而尺中遲者。不可發汗。何以知之。夫尺主下焦。遲則爲寒。尺中遲。是以知下焦命門真陽不足。不能蒸穀氣而爲榮。爲衛也。蓋汗者。榮中之血液也。爲熱氣所蒸。由榮達衛而爲汗。若不量其虛實而妄發之。則亡陽損衛。固不待言。然

榮氣出於中焦。衛氣出於下焦。榮衛皆出於三焦。三焦皆根於命門。命門涵藏於兩腎。尺遲則知腎中之真元不足。三焦之氣弱矣。此以寒氣傷榮。汗由榮出。以尺中脉遲。則知腎藏真元衰少。榮氣不足。血少之故。未可以汗奪血。所以尤不可發汗也。

脉浮數者。法當汗出而愈。若下之。身重心悸者。不可發汗。當自汗出乃解。所以然者。尺中脉微。此裏虛。須表裏實。津液自和。便自汗出愈。

脉浮數。法當汗出而愈者。即前第四條脉浮而數者。

可發汗之例也。身重之證。論中所見不一。有風濕風溫。風寒火逆。及陰陽易。三陽合病之不同。此所謂身重者。因邪未入裏。誤下而胃中陽氣虛損也。凡陽氣盛則身輕。陰氣盛則身重。故童子純陽未雜而輕儇跳躍。老人陰盛陽衰而肢體龍鍾。是其驗也。所以邪入於陽則狂。邪入於陰則不能反側也。誤下陽虛。與誤汗陽虛無異。此條心悸。與發汗過多。又手冒心之心下悸。同一裏虛之所致也。但誤汗則先亡其衛外之陽。而後及於裏。此因誤下而竟虛其裏。所以誤汗

尚有桂枝甘草湯和衛之治。此條脉浮而數。法當汗出。尚有表邪。故無補裏之法。直待其津液自和。而後汗出愈也。須待也。言脉浮數。而發熱惡寒之邪在表。若不汗解而誤下之。邪氣雖未陷入。而爲痞結之變。但身重心悸者。則知陽氣已虛。不可更發其汗。當待其自汗出。乃可解也。其所以然者。浮數之脉。因誤下之後。尺中之脉見微弱耳。蓋尺中者。腎脉也。腎爲藏精之府。津液之主也。然津液之流貫周行也。皆命門真陽之氣蒸騰升降。故能隨營衛而運行滋灌。若見

尺中脉微。是裏虛而津液衰少。陽虛而氣不蒸騰。即上文尺中遲之變文也。故不可發汗。當待其下後所損之真陽漸復。氣液蒸騰。營衛流行。則津液自和。便自汗出而愈矣。上條不立治法。亦此義也。

辨誤 前輩註釋。見原文中有尺中脉微四字。又見津液自和一語。便泥定下多亡陰之說。但以爲陰虛而津液少。故不可發汗。不知津液之來。皆生於蒸騰之陽氣。苟非邪火燔灼。焉得枯涸。所謂火蒸水而爲氣。氣凝聚而爲水。陰陽相須。水火升降。然後氣液周



流。故謂之陰無陽不生也。豈但亡其陰。而陽氣獨無損乎。觀尺中脉遲脉微二語。明係陽虛之變現。所以桂枝二越婢一湯之條內。明言脉微弱者。此無陽也。詎可獨責之裏陰素虛乎。大抵微遲之脉。汗下皆不宜。六經原文中彰彰可攷也。

咽喉乾燥者不可發汗。古

咽喉乾燥。上焦無津液也。上焦之津液。即下焦升騰之氣也。下焦之氣液不騰。則咽喉乾燥矣。少陰之脉循喉。挾舌本。熱論篇云。少陰脉貫腎絡於肺。繫舌。

本。故口燥舌乾而渴也。邪在少陰。故氣液不得上騰。即上文尺中微遲之類變也。故曰不可發汗。後人以爲津液素虧。發汗則竭。陽明之津液。誤矣。皆由成氏以咽門爲胃之系故也。如此而反指前人以少陰立說者爲謬。揆之於理。豈其然乎。

淋家不可發汗。發汗則便血。十五

淋之爲病。有膏淋。石淋。血淋。肉淋等之分。雖有寒熱虛實之異。然皆爲腎虛之所致。蓋腎主二陰之竅。與膀胱相爲表裏而爲一合者也。腎爲臟而膀胱爲腑。

臟爲主而腑爲使。然腎爲三焦之原。三焦爲命門之用。若腎臟之真陽不充。則三焦之氣化失常矣。是以下焦之真氣衰弱。則氣不流利而爲瀉爲痛。膀胱之氣化混淆。則水不分清而爲濁爲黏矣。而况淋之爲病。從精隧而出者乎。肺爲人身之天氣。水液由肺氣而下行。忽凝結而爲膏爲石。猶之雨化爲雹。總爲氣化之乖違。衝脉爲血之海。其脉起於胞中。謬隨氣液而滲入膀胱。恰似淫流入渭。悉屬陰陽之錯亂。又非至真要大論之所謂水液渾濁。皆屬於熱之赤白濁。

可比也。且命門之真陽，爲衛氣之根本。皮毛之衛氣，乃真陽之外發。發汗則外亡衛氣，內喪真陽矣。若傷寒家既有淋證，則知腎氣已虛，真陽虧損。又豈可故發其汗乎？倘不知禁忌而誤發其汗，則必至於元陽敗泄，真氣大虛。陽不能固其陰，氣不能攝其血，致動少陰之血，從便瀉而出矣。其亦內經所云：胞移熱於膀胱，則爲癰溺血之類乎？

衄家不可發汗。汗出必額上陷，脉急緊，直視不能眴，不得眠。十六

衄。鼻出血也。額上非即額也。額骨堅硬。豈得即陷。蓋額以上之額門也。鼻雖為肺之竅而上通於腦。貫督脉。自額上巔。由腦後風池。風府。大椎。陶道。靈臺。至陽。過命門而至長強。前則內通於肺。達膻中氣海。而為呼吸之要道也。脉急緊者。言目系急緊也。眴。本作旬。音絢。目搖動也。所謂衄家者。即論中所云發煩目瞑。必衄。及傷寒脉浮緊。不發汗因致衄者。又云脉浮緊。發熱無汗。自衄者愈。其皆用麻黃湯者。非謂衄後當用麻黃湯也。言此等無汗致衄者。當先用麻黃發其

汗。則不至於衄矣。若無汗而不發其汗。則熱邪內鬱。必待自衄而愈。若不發其汗。又不得自衄。則變症多矣。何也。夫汗者。陽氣蒸營血之所化也。在營則居於脉中而爲血。陽氣鬱蒸。則由營達衛。蒸氣外泄而爲汗。汗泄則邪隨汗出而解矣。不發其汗而衄。則熱邪亦隨衄而泄。所以自愈也。若此。則何必於衄後更發其汗乎。況更有未病之前。素有衄證者乎。倘衄血之後。督脉腦髓之陽氣已泄。營分血脉之陰氣已虛。而復發其汗。是犯虛虛之戒矣。生氣通天論云。陽氣有。

精則養神。柔則養筋。五藏生成篇云。諸脉者皆屬於目。諸髓者皆屬於腦。諸筋者皆屬於節。諸血者皆屬於心。故人臥則血歸於肝。肝受血而能視。血行而不得反其空。則病矣。是以誤汗則陽氣不充於腦。而額上之顙門必陷。血虛則系目之筋脉急緊而直視。所以睛不能轉側而搖動也。經云。奪血者無汗。奪汗者無血。衄後則無血以歸肝。而神不歸舍。失汗則衛氣失常。不能行陰二十五度。所以不得眠也。是故有邪氣則邪氣當之。無邪氣則元氣當之。其可忽乎哉。

亡血家不可發汗。發汗則寒慄而振。十七

夫血者。陰也。氣者。陽也。陰陽者。一氣之分也。腎者。人身之兩儀也。命門胞中者。太極也。兩腎涵藏真氣。分陰分陽。陰陽相倚。氣血交互而成形體也。亡血。失血也。或吐或衄。或便或溲。或崩或產。或破損皆是也。血亡則陰氣亡矣。汗者。陰血之所化。陽氣之所蒸也。陰血既亡。非唯無以爲汗。抑且孤陽子立矣。若不量虛實。妄發其汗。則不但陰血更竭。併孤陽而盡亡之矣。安得不寒戰鼓慄而身振搖耶。危矣。殆矣。



濟世集 卷二  
瘡家雖有身疼痛。不可發汗。汗出則痊。六

瘡家。非謂疥癬之疾也。蓋指大膿大血。癰疽潰瘍。楊梅結毒。膿瘡痘疹。馬刀俠癭之屬也。身疼痛。傷寒之表證也。言瘡家氣虛血少。營衛衰薄。雖或有傷寒身體疼痛等表證。亦慎不可輕發其汗。若誤發其汗。則變逆而爲瘥矣。瘥者。即所謂身熱足寒。頸項強急。惡寒時頭熱面赤。目脉出。獨頭面搖。卒口噤。背反張者是也。然其所以致此者。皆由陰陽兩虛。氣血衰少。發其汗。則陽氣鼓動。陰液外泄。陽亡則不能柔養。血虛

則無以滋灌。所以筋脉勁急而成瘥也。故仲景於瘥證中有云。太陽病。發汗太多。因致瘥也。豈有所謂重感寒溼。外風襲虛之說哉。

汗家重發汗。必恍惚心亂。小便已。陰疼。與禹餘糧丸。

關元

汗家。傷寒家已經發汗。及自汗盜汗者皆是也。重發汗者。已發而再發也。傷寒汗出不徹者。當重發其汗。以盡其邪。若發汗已徹。衛氣已虛。更疑尚有餘邪。又重發其汗。則虛其虛而致亡陽之變。必恍惚心亂矣。恍惚者。心神搖蕩而不能自持。心亂者。神虛意亂而

不得自主也。神者。心之所藏。陽之靈也。隨神往來者。魂也。所以任物者。心也。是以神留則生。神去則死也。此以重發其汗。陽亡神散。故恍惚心亂也。小便已而陰痿者。汗後虛陽上越。下焦無陽。氣弱不利而莖中澹痛也。猶陰陽易之少腹裏急。或引陰中拘攣之類也。禹餘糧丸雖關。然餘糧乃鎮墜之重劑。專主下焦前後諸病。所以能鎮恍惚之心亂。治便已之陰痿。其佐使之屬。或有扶陽補虛之用。未可知也。

## 傷寒誤汗

誤汗者。非必不當汗而汗之。方爲誤汗。即應用麻黃湯症。亦但許發微似汗而已。寧許其大汗出乎。即使太陽中風。發熱汗出之症。亦當以桂枝湯發其微似汗。尚有如水流漓之戒。若使犯之。亦爲誤汗。況麻黃湯乎。後人但知麻黃爲發汗之藥。而以桂枝爲止汗之藥。殊不知麻黃桂枝兩湯。皆能使人誤汗亡陽。故上篇亦有誤汗之變。乃中風傷寒之所均有。因難以分篇。不得

已而俱入中篇。讀者審之。

發汗已。脉浮數。煩渴者。五苓散主之。二十

此條無傷寒二字者。以下節承上文語中有之。是以知其爲傷寒也。此條義理深微。最不易解。若以常法論之。則脉之浮數。當云浮則爲風。數則爲熱。似與上文脉浮而數。可發汗。用麻黃湯之同類矣。以證之煩渴論之。則煩爲熱邪在裏。渴則胃中熱燥。又當與白虎加人參湯症相類矣。而長沙以五苓散主之。似乎以熱治熱。其義今人不解。所以歷代註家。俱不得其

肯。故成氏有脉浮數爲表邪未盡。煩渴爲亡津液而胃燥之解。與五苓散和表潤燥。遂以桂改桂枝而曰兩解表裏。然桂枝雖能和表。豈能潤燥。况原方本來用桂而非桂枝乎。條辨又以汗出過多。腠理反開。風邪又入。煩熱而脉轉浮數。渴者。亡津液而內燥。故用四苓以滋之。一桂以和之。亦以五苓爲兩解。愚竊謂津液旣亡。四苓之淡滲下走。如何可滋。津液旣燥。一桂之辛散溫熱。如何治燥。尚論一如其說而不改。致仲景之肯。晦而不彰者久矣。余欲析其義。深思而未

得其解。閻筆者半月餘。因思天地陰陽升降之道。乃悟陰陽應象論所謂地氣上爲雲。天氣下爲雨。雨出地氣。雲出天氣之義。而得煩渴用五苓散之旨。其故在發汗已三字。蓋因汗多亡陽。下焦真陽已虛。無蒸騰之用。乃地氣不升之所致也。然渴之一症。各有不同。如太陽之渴。以膀胱之氣化言。因氣液不得上騰。故專用五苓散主之。陽明之渴。以胃中津液枯燥言。故以白虎湯主之。少陽以邪在半表半裏。往來寒熱。或作或輟。故或渴或不渴。而以小柴胡湯加減主之。

也。至於三陰則無渴證矣。雖有少陰引水自救。及厥陰消渴等證。非真渴也。歷代以來。唯李東垣知清陽有上升之義。故云渴爲太陽之本證也。然五苓散。凡六見於論中。皆以之專治太陽渴證。而兼利小便者。以氣化言也。蓋因深明經義。知陰陽升降。天地氣交之妙。默會膀胱爲州都之官。津液藏焉。氣化則能出矣。及三焦爲決瀆之官。水道出焉之奧義。故知氣上騰而爲津液涕唾則不渴。氣下降而成水液則便瀉。所謂氣化之功也。若下焦無蒸騰之用。是腎藏之地。



氣不升。則上焦無氣液之潤而渴矣。地氣既不升騰。則肺藏之天氣不降。無雨露之施而小便不利矣。是以太陽之表。爲膀胱之經。膀胱爲腎之府。過發其汗。衛陽敗泄。真陽虛衰。下焦無火。腎氣不蒸。故上無津液而渴也。其立方之義。用桂以助腎藏蒸騰之氣。更用諸輕淡。以沛肺家下降之功。使天地陰陽之氣交通。氣化流行而上下之氣液皆通矣。義詳五苓散方論中。

辨誤 五苓散一方。後人不能窺仲景立法之微妙。

俱憚桂之辛熱而不敢用。遂改桂爲桂枝。而曰以四  
苓滋其內。桂枝以解其外。爲表裏兩解之劑。喻氏更  
以爲朮用蒼。桂用枝。則於立方本意愈遠愈失矣。豈  
以仲景立法之祖。不知畏避。反於脉浮數而煩渴之  
證。偏用之耶。又於痞證中之瀉心所不能解。其人渴  
而口燥煩。小便不利者。及陽明證中不更衣十日。渴  
欲飲水者。亦樂用之耶。讀古人書而不知古人之工  
夫學力。漫以訛傳俗。習之膚見窺之。遂至不達其意。  
致廢而不用。惜哉。

傷寒汗出而渴者。五苓散主之。不渴者。茯苓甘草湯主之。  
二十一

此條欲言汗出不渴之治。故復叙上文汗出而渴之症。非另立一證也。其不再言脉浮數而煩渴者。因是承上文語。故畧之也。其所以又出不渴一條者。所以形容上文汗出而渴之一證。難測難治。最易誤人。以最煩熱之脉症。而用最不易用之熱藥也。唯其有此平常容易。乃見上文之隱晦難明。觀其文理之密。別識之精。而註家茫然不知。良可爲之浩歎也。言上文

所云傷寒服麻黃湯後。汗出多而渴者。為真陽已虛。非五苓散不足以治之矣。若汗出而不渴者。則其汗未為太過。知陽氣未虛。津液無損。氣化如常矣。然初汗之後。恐衛氣未和。津液未布。故但以茯苓甘草湯主之。亦收拾餘邪之意也。

茯苓甘草湯方

茯苓

二兩

桂枝

二兩

生薑

二兩

甘草

一兩

右四味。以水四升。煮取二升。去滓。分溫三服。

辨誤 前中風篇內。明言桂枝本為解肌。若脈浮緊

發熱汗不出者。不可與也。此條明係傷寒。何故反用桂枝。若不明辨。何怪前人。以桂枝爲固衛止汗乎。蓋仲景之用桂枝湯者。以陽浮熱自發。故以桂枝之辛溫解散。發衛家之微汗。又以陰弱汗自出。故以芍藥之酸收。斂營陰之汗液也。夫汗者。陽氣蒸陰液之所成也。陰液者。營血之所化也。若寒邪入營。正宜以麻黃湯泄其營內之寒邪。豈宜以芍藥之酸收。斂其營氣乎。故曰不可與也。此條雖係傷寒。而已經發汗矣。猶恐尚有遺邪。營氣終未當斂。故以茯苓之滲利代

之。但以桂枝甘草調和衛氣而已。較之用芍藥之桂枝湯。非大相逕庭乎。所謂不可與者。蓋不與桂枝湯耳。非不與桂枝也。

發汗後。水藥不得入口。爲逆。若更發汗。必吐下不止。主舊說桂枝有四禁。此條亦在禁例。余閱仲景論中。既有桂枝本爲解肌。其人脈浮緊發熱汗不出者。不可與也一條。則凡寒傷營之證。皆在所禁。豈止四條。此所謂發汗者。用麻黃湯發汗過多也。誤汗則胃中陽氣虛損。胃本司納。因胃中虛冷。氣上逆而不受。故水

藥俱不得入口。以主納者不得納。故謂之逆。然與水逆證之水入則吐不同也。彼以未經汗解。表裏俱有邪。水既入而後吐。故曰水逆。此以誤汗亡陽。胃虛氣逆。水藥不得暫入。故但謂之逆。言誤汗變逆。已致水藥不得入口矣。若又不知而更發其汗。則胃陽愈敗。必至中氣不守。上吐下泄而不止矣。此條仲景雖未立方。然溫中扶胃之法。如人參桂枝湯之類。可酌用也。或曰誤汗亡陽。不過損泄衛氣耳。既非誤下。何至內傷胃氣而水藥不得入口。且甚至吐下不止乎。夫

人身先天陽氣藏於兩腎之中。其清陽升發而爲三焦之氣。附於肝膽。布其陽氣而爲後天之火。溫養脾胃。故飲食入胃。穀之濁氣下降。爲命門真火之所蒸騰。則陽氣發越。其慄悍滑疾之氣。直達皮膚而爲衛氣。是以誤汗則衛氣喪失。真陽大虛。胃氣亦隨之而損也。惡得有衛陽敗泄而胃氣無損者乎。仲景深知經義。故能言之。但未肯道其詳耳。後人每以心火相火三焦火胃火分論。不知天之六氣。地之五行。即陰陽二氣之分也。二氣之分。又即一氣之升降也。孫真



人云。不知太易。不足以言醫。况併不知經義。更曷足以言醫。嗚呼。斯道之不振。又安足怪乎。

發汗後。其人臍下悸者。欲作奔豚。茯苓桂枝甘草大棗湯主之。三

奔豚者。即前燒鍼令汗。鍼處被寒所發之奔豚。乃腎家奔突上衝之陰邪也。悸者。築築然惕動。狀若心驚而恍惚跳躍也。誤汗之後。陽氣已虛。下焦陰寒之氣。欲作奔豚而氣先上逆。故從臍下忽築築然而悸動也。前針處被寒。以必作奔豚。從少腹上攻心。其勢較

甚。故以桂枝加桂湯溫散其寒邪。此條但云欲作奔豚。欲作非必作可比。乃可作可不作之間耳。但因臍下悸。知陰氣已動。恐其欲作奔豚。故以茯苓桂枝甘草大棗湯主之也。

茯苓桂枝甘草大棗湯方

茯苓

半斤

桂枝

四兩

甘草

二兩

大棗

十五枚

右四味。以甘瀾水一斗。先煮茯苓減一升。內諸藥煮取三升。去滓。溫服一升。日三服。

取甘瀾水法 取水二斗。置大盆內。以杓揚之。水上有

珠子五六千顆相逐。取用之。

茯苓氣味淡而滲。陽中之陰。其性上行而後下降。能  
滋水之源而降下。本草謂其能利小便而伐腎邪。故  
倍用之以爲君。桂枝辛溫和衛而能宣通陽氣。故多  
用之以爲臣。李東垣云。陽不足者補之以甘。故鳳髓  
丹用甘草。以緩腎之急而生元氣也。更用大棗以和  
潤其津液而劑成矣。用甘瀾水者。動則其性屬陽。揚  
則其勢下走故也。

發汗後。腹脹滿者。厚朴生薑甘草半夏人參湯主之。<sub>茜</sub>

腹脹滿者。太陰脾土之本證也。發汗後。陽氣虛損。胃氣不行。脾弱不運。津液不流。陰氣內壅。胃病而脾亦病也。雖非誤下成痞。而近於氣痞矣。以厚朴生薑甘草半夏人參湯主之。

厚朴生薑甘草半夏人參湯方

厚朴

半斤去皮炙

生薑

半斤切

半夏

半斤洗

人參

一兩

甘草

二兩炙

右五味。以水一斗。煮取三升。去滓。溫服一升。日三服。

厚朴味苦辛而性溫。下氣開滯。豁飲泄實。故能平胃。

氣而除腹滿。張元素云。治寒脹而與熱藥同用。乃結者散之之神藥也。此雖陽氣已傷。因未經誤下。故虛中有實。以胃氣未平。故以之爲君。生薑宣通陽氣。半夏蠲飲利膈。故以之爲臣。參甘補中和胃。所以益汗後之虛耳。然非脹滿之要藥。所以分兩獨輕。由此推之。若胃氣不甚虧而邪氣反覺實者。尚當消息而去取之。未可泥爲定法也。觀金匱之治腹痛腹滿。仲景以厚朴三物湯治之。皆與枳實大黃同用。則虛實之分自見矣。

發汗過多。其人又手自冒心。心下悸。欲得按者。桂枝甘草湯主之。廿五

發汗過多者。前桂枝本爲解肌。過多尚有如水流漓之戒。若過用麻黃湯。尤爲發汗過多。則陽氣大虛。陽本受氣於胃中。故膻中爲氣之海。上通於肺而爲呼吸。位處心胸之間。發汗過多。則陽氣散亡。氣海空虛。所以叉手自冒覆其心胸。而心下覺惕惕然悸動也。凡病之實者皆不可按。按之則或滿或痛而不欲也。故內經舉痛論云。寒氣客於經脉之中。與炁氣相薄。

則脉滿。滿則痛而不可按也。又云脉充大而血氣亂。故痛甚不可按也。此以誤汗亡陽。心胸真氣空虛而悸動。故欲得按也。因此條是誤汗所致。故以桂枝甘草和衛扶陽。補益中氣。但此方性味和平。力量淺鮮。如參芍之補斂。恐不可少。仲景立方。諒不止此。或有脫落。未可知也。若方氏以心血爲重。置陽虛而弗論。尚論譏之。不亦宜乎。

桂枝甘草湯方

桂枝

四兩

甘草

二兩

右二味。以水三升。煮取一升。去滓頓服。

義具註中  
不另立論

未持脉時。病人又手自冒心。師因教試令欬而不欬者。此必兩耳無聞也。所以然者。以重發汗。虛故如此。共

此論誤汗陽虛之耳聾。以辨不必邪在少陽。然後耳聾也。夫足少陽之脉。起於目銳眥。上抵頭角。下耳後。其支者從耳後入耳中。出走耳前。下胷中。貫膈絡肝屬膽。循脇裏。故素問熱論篇云。少陽主膽。其脉循脇絡於耳。故胸脇痛而耳聾也。若夫汗後陽虛。皆以發汗過多。衛陽散亡之故。非邪在少陽也。以服桂枝而



如水流漓。已爲痛戒。如麻黃湯者。其可重用乎。所以  
古人用藥治病。中病則已。五常政大論所謂小毒治  
病。十去其八。無毒治病。十去其九。無使過之。傷其心  
也。然以衛氣散亡而能令人耳聾者。何也。耳者。腎之  
竅也。陰陽應象論云。在藏爲腎。在竅爲耳。衛氣者。乃  
胃中穀氣下降。爲腎中真陽之所蒸騰。發越而布於  
皮膚。以捍衛風寒者也。營衛皆屬太陽而爲表。真陽  
藏於少陰兩腎之中而爲裏。故一藏一府。相爲表裏  
而成一合也。誤汗亡陽。則腎家之真陽敗泄。所以腎

竅之兩耳無聞。猶老年腎憊陽衰。亦兩耳無聞。其義一也。仲景雖不立治。然欲治之。亦不外乎汗多亡陽之法也。

發汗病不解。反惡寒者。虛故也。芍藥甘草附子湯主之。  
發汗病不解者。發汗過多而陽氣虛損。故生外寒。仍如未解之狀也。惡寒而曰反者。不當惡而惡也。本以發熱惡寒而汗之。得汗則邪氣當解而不惡寒矣。今病不解而反惡寒者。非風寒在表而惡寒。乃誤汗亡陽。衛氣喪失。陽虛不能衛外而惡寒也。或曰。旣云發

汗病不解。安知非表邪未盡乎。曰。若傷寒汗出不解。則當仍有頭痛發熱。脈浮緊之辨矣。而仲景非唯不言發熱。且毫不更用解表。而毅然斷之曰。虛故也。即以芍藥甘草附子湯主之。則知所謂虛者。陽氣也。與上文虛字無異。其脈必微弱。或虛大虛數。而見汗出。但惡寒之證。如附子瀉心證。及用桂枝加附子湯。桂枝去芍藥加附子湯之類。故曰虛故也。而以芍藥甘草附子湯主之。

芍藥甘草附子湯方

芍藥 三兩

甘草 三兩

附子

一枚炮去  
皮破八片

已上三味。以水五升。煮取一升五合。去滓分溫服。

芍藥酸收。斂汗液而固營陰。附子辛熱。補真陽而強衛氣。甘草扶植中州。調和營衛。所謂溫經復陽之治也。

發汗後惡寒者。虛故也。不惡寒但惡熱者。實也。當和胃氣。與調胃承氣湯。 艾

上二句。是承上文語。所以起下文者也。言前條云發汗後惡寒者。以汗後陽虛故也。若發汗之後。不惡寒

而反惡熱者。非虛證也。乃汗後太陽已罷。邪轉陽明。爲胃實之證。當和其胃氣則愈矣。然既汗之後。陽氣已虛。不宜大下。故當與調胃承氣湯。即陽明篇所謂與小承氣湯。微和胃氣。勿令大泄下是也。

發汗後。飲水多者必喘。以水灌之亦喘。廿九

發汗之後。衛外之陽氣已疎。胃中之真陽已損。若津液竭而渴欲飲水。當如太陽上篇中風發汗後欲得飲水者。少少與之可也。若飲水過多。則胃虛不運。水冷難消。必至停蓄不滲。水寒侵肺。呼吸不利。故肺脹

胸滿。氣逆而喘急也。若以冷水灌濯。則營衛先已空疎。使寒邪入腠。水氣侵膚。肺本主乎皮毛。故內通於藏而亦爲喘也。肺熱而喘者。故用麻黃杏仁甘草石膏湯。此以汗後水寒而喘。則去麻黃加葶藶之小青龍湯。或可酌用也。

發汗若下之。病仍不解煩躁者。茯苓四逆湯主之。三十

既發其汗。則表邪當解。若又下之。裏邪亦當解矣。乃仍不解而煩躁者。此非鬱熱不解。大青龍之煩躁也。蓋因汗之太過。亡其衛外之陽。下之太甚。又損其胃。

腕之陽。致無陽而陰獨故也。煩躁者。陰盛迫陽。虛陽攪擾則作煩。陰邪縱肆則發躁。補虛復陽。乃其治也。故以茯苓四逆湯主之。然大青龍之煩躁。因熱邪不得發越所致。乃實邪也。故用汗泄涼解之劑。茯苓四逆之煩躁。因陰盛陽虛所致。乃虛邪也。故當用收復溫補之藥。尚論引入青龍項中。良有以也。

茯苓四逆湯方

茯苓

六兩

人參

一兩

甘草

二兩

乾薑

一兩

附子

一枚去皮  
破八片

右五味。以水五升。煮取三升。去滓。溫服七合。日三服。  
茯苓虛無淡滲而降下。導無形之火以入坎水之源。  
故以爲君。人參補汗下之虛而益胃中之津液。乾薑  
辛熱守中而煖胃。附子溫經。直達下焦。導龍火以歸  
源也。



傷寒誤下

傷寒醫下之。續得下利。清穀不止。身疼痛者。急當救裏。後身疼痛。清便自調者。急當救表。救裏宜四逆湯。救表宜桂枝湯。三十一

此論誤下之後。證有表裏緩急之分。治有先後虛實之當急也。下之。誤下之也。續。連續也。言因誤下之虛。遂續得下利不止也。清穀。清水完穀也。誤下而胃虛裏寒。致完穀不化也。前後兩身疼痛。義各不同。一以陰寒在裏而痛。一以寒邪在表而痛也。上截所謂身

疼痛者。因誤下陽虛。陰寒在裏。無陽氣以嘘培柔養。故身疼痛。與上篇人參新加湯同義。雖有誤汗誤下之不同。而陽虛則無不同也。後身疼痛者。指傷寒之表症而言也。後謂下後。非救裡之後也。寒氣傷營。營血滯滯。不快於流行而痛也。清便自調。謂小便清而自調。邪未入裏之徵也。急救者。唯恐不及之詞也。言寒傷營之證。設醫以藥誤下之。致胃陽敗損。裏氣虛寒。胃不殺穀。津液不守。所以隨得下利。清穀不止也。猶身疼痛者。無陽氣以溫養筋骸。流通氣血之故也。

既無表證。但見裏寒。故當急救其裏也。若誤下之後。但身疼痛。小便清而自調者。知其寒邪但在於表。猶未入裏。乃傷寒首條之惡寒體痛。及次條身疼腰痛。骨節疼痛。惡風無汗之身疼痛也。當急救其表。若不急救其表。則外邪必乘誤下之虛。陷入於裏而爲變逆之證。故云急也。然則救裏維何。宜以四逆湯溫裏復陽可也。若救表。則當以桂枝湯汗解之。然桂枝湯之不可用於傷寒也。前上篇第十二條已有明禁矣。而此條反用之。豈仲景二三其說耶。不知仲景所禁。

但禁脉浮數而發熱汗不出者。乃未治之傷寒也。此條已屬傷寒誤下。胃陽已虛。陰邪已盛。衛氣已虛。不宜復用麻黃湯發汗。更亡其陽矣。故以桂枝之辛溫。宣通其陽氣而微解其表。則溫散兩全而無害矣。此又定法中之活法。未可執一論也。

辨誤 此節是兩段文。當作兩截解。傷寒醫下之句。是一條之總冒。言假若下之後。續得下利清穀不止。而身疼痛者。其裏寒已甚。陽氣將危。且全無表證。故急當救裏。是以無陽之裏證爲急也。此三句。是上半

截義。又言如下後。但有身疼痛之表證。而清便自調者。是並無裏證可知。故急當救表。裏既無邪。當以表邪爲重。此三句。是下半截義。故下文又以兩方分隸兩義之下。而總結之。辭義井井。爽然可見。不意成氏以來。各註家俱作一義解。皆云救裏之後。得清便自調。然後與桂枝湯救表。若果如此論。則下截之者字。與急字。皆不須用矣。豈溫經救裏之後。身尚疼痛。直待清便自調。裏氣已和。然後救表。尚可云急乎。如厥陰條中。下利腹脹。身體疼痛。先溫其裏。乃攻其表。方

爲次第分明。允爲一義。此條乃裏證急則救裏。無裏證則救表。因證施治之活法。故有兩者字。及兩急字以分之。豈可混講。只因後身疼痛之後字上。脫一下字。稍覺模糊。遂成千古之惑。奈註者不辨語氣。不清脈理。泛然下筆。致失作者之意。竊爲前輩惜之也。況傷寒用桂枝之禁。前中風條內。凡諸註家。皆能申伸景之意。而豐豐言之。纔至傷寒例中之桂枝湯。豈遂忘之。而竟置之弗論耶。此正所謂隨文順釋而已。又何裨於後學哉。

傷寒五六日。大下之後。身熱不去。心中結痛者。未欲解也。梔子豉湯主之。三十二

五六日。雖爲邪當入裏之候。然有邪尚在表而未解者極多。總以表證旣去而無裏證者。爲邪氣已解。表證初罷而隨見裏證者。爲外邪入裏未可以日數拘也。今五六日而身熱不去。是表證尚未除也。大下之後。若表邪盡陷。則身不熱而爲痞結。及協熱下利等變證矣。今乃身熱不去。是邪氣半留於表也。心中結痛。是邪氣半入於裏也。表裏皆有邪。是以謂之未欲

解也。然邪入猶淺。初入於上焦心胸之間耳。若用表裏兩解之法。則邪未入胃。豈宜攻裏。無若就近取之。則以高者越之之法爲便。故以梔子豉湯吐之。則內邪隨湧而上出。外邪又因吐得汗而解矣。

梔子豉湯方

梔子

十四枚 擘

香豉

四合 綿裹

右二味。以水四升。先煮梔子得二升半。內豉煮取一升半。去滓。分爲二服。溫進一服。得吐者止後服。

梔子本草不言其能吐。而仲景獨用之以吐胸邪。故



張子和三法中亦有之。蓋因其味苦性寒。而其味懊惱。故能令人吐。然亦大概以雞羽探之耳。淡豉本主傷寒寒熱。瘴氣惡毒時疾熱病。李時珍云。黑豆性平。作豉則溫。既經蒸罾。故能升能散。得蔥則發汗。得鹽則能吐。得酒則治風。得薤則治痢。得蒜則止血。炒熟則又能止汗。其合梔子而能吐膈間之邪者。蓋取其能升能散能吐耳。

發汗若下之而煩熱。胸中窒者。梔子豉湯主之。

三十三

已發汗之後下之而致煩熱鬱悶。胸中窒塞者。因汗

不徹而邪未解也。然既汗之後，邪氣已減，有限之餘邪，陷入胸中，故不至結痛，而但覺窒礙耳。邪在胃中，最宜上越，故亦以梔子豉湯主之。

傷寒下後，心煩腹滿，臥起不安者，梔子厚朴湯主之。三

傷寒表證未除而誤下之，下後外邪陷入，在膈則煩，在胃則滿。既煩且滿，所以躁擾不寧，臥起皆不安也。邪氣雖入，未成痞結，陰陽應象論云：高者因而越之。中滿者瀉之於內，所以用梔子之苦寒，湧越其心胸之虛邪。厚朴枳實之苦辛，以泄其脹滿之濁氣，故以

梔子厚朴湯主之。然汗隨吐發。故不須更解其表也。

梔子厚朴湯方

梔子

十四枚

厚朴

四兩

枳實

四枚

已上三味。以水三升半。煮取一升半。去滓。分二服。溫進一服。得吐者止後服。

傷寒醫以丸藥大下之。身熱不去。微煩者。梔子乾薑湯

主之。三十五

傷寒表邪未解。醫不知而以峻厲丸藥大下之。宜乎

陷入而為痞結矣。而身熱不去。是邪未全陷。尚有留

於表者。微覺煩悶。乃下後之虛邪陷膈。將結未結之徵也。大下之後。既不可復發其表。又不可再攻其裏。矧邪之猶在胸膈也。速宜以梔子乾薑湯湧之。則煩悶之胸邪。得上越而出。身熱之表邪。亦因吐而汗解矣。立方之義。蓋以身熱微煩。用梔子之苦寒。以涌胸中之邪。誤下傷胃。取乾薑之辛熱。以守胃中之陽。則溫中散邪之法。盡之矣。

梔子乾薑湯方

梔子

十四枚

乾薑

二兩

右二味。以水三升半。煮取一升半。去滓。分二服。溫進一服。得吐者止後服。

發汗吐下後。虛煩不得眠。若劇者。必反覆顛倒。心中懊懣。梔子豉湯主之。若少氣者。梔子甘草豉湯主之。若嘔者。梔子生薑豉湯主之。三十六

既汗吐下。則正氣皆虛。邪猶未盡。雖不比實熱之邪。陷入而爲結爲痞。然虛邪內入。亦足以作虛煩。而令人不得安眠也。若邪重而劇者。必至煩熱擾亂。令人神志昏憤。反覆顛倒。心中若有所懊恨不平者然。此

皆虛邪在膈之所致也。湧而越之。則無形之邪隨吐而散矣。故以梔子豉湯主之。若上文證而少氣者。因汗吐下後。胸中之陽氣已虛。膻中之呼吸不足。中氣大虛。再湧則恐傷胃氣。故加甘草以補中和胃。庶無損於元氣也。若加乾嘔者。是汗吐下後。胃中陽氣已傷。中焦虛冷。胃氣不和。氣上逆而乾嘔也。故加生薑之辛溫。以宣達胃中之陽。和煖中州之氣。則雖更用吐法。亦無傷於胃陽。而氣自和平矣。此皆因時制宜之法也。

梔子甘草豉湯方

於梔子豉湯方內。加入甘草二兩。餘依前法。得吐止  
後服。

梔子生薑豉湯方

於梔子豉湯方內。加生薑五兩。餘依前法。得吐止。  
後服。

凡用梔子湯病人舊微瀉者。不可與服之。  
三十七

梔子苦寒。用之蓋所以吐胃中之煩熱者也。若病人  
平昔大便微瀉者。則中氣本自虛寒。用之恐寒涼損  
胃。反致大腸滑泄。故不可與服。倘必欲湧邪。則戴人

吐法中有甘溫之藥可酌選也。

傷寒若吐若下後。心下逆滿。氣上衝胸。起則頭眩。脈沉緊。發汗則動經。身爲振振搖者。茯苓桂枝白朮甘草湯主之。三十八

傷寒本當以麻黃湯汗解。若吐下之。則治之爲逆。心下者。胃脘之間也。逆滿。氣逆中滿也。脈沉緊。沉爲在裏。緊則爲寒。蓋陰寒在裏也。動經。經脈潤動也。身爲振振搖。即上篇振振欲擗地之漸也。言傷寒不以汗解。而妄吐下之。致胃中陽氣敗損。寒邪陷入而逆滿。



陰氣上衝而頭眩也。陰寒在裏。故脉見沉緊也。陽氣已爲吐下所虛。若更發其汗。必至亡陽而致經脈動惕。身不自持而振振然搖動矣。動經振搖。與上篇心悸頭眩。身瞤動而振振欲擗地者。幾希矣。故用桂枝以解散外邪。通行陽氣。而以茯苓白朮甘草補中氣而治其吐下之虛也。然傷寒而不忌桂枝者。以桂枝本能解表。且不用全湯。無芍藥之酸收故也。但藥物平易。倘用之而未効。真武湯或在可擬之列也。

辨誤 條辨等註家。俱謂心下逆滿。氣上衝胸爲寒。

邪挾飲。搏實於膈。脉見沉緊。明係飲中留結外邪。若發汗強解。津液盡竭。傷動經脉。故有身爲振搖之患。其言若此。是全不知爲亡陽之變。與誤汗條中之振振欲擗地相似。反多增一伏飲之說。理殊不解。恐未精切。姑錄之以俟智者之鑑。

茯苓桂枝白朮甘草湯方

茯苓

四兩

桂枝

三兩

白朮

二兩

甘草

二兩

右四味。以水六升。煮取三升。去滓。分溫三服。解見註中

傷寒蓄血

蓄血與上篇同義。因上冠傷寒二字。故仍置之  
中篇。

傷寒有熱。少腹滿。應小便不利。今反利者。爲有血也。當  
下之。不可餘藥。宜抵當丸。

此與上篇三條互相發明。非有中風傷寒之別也。言  
傷寒有熱邪在裏而少腹滿者。應小便不利。何以言  
之裏熱則津液枯竭。少腹滿則膀胱不瀉。故應小便  
不利。今反利者。乃邪不在氣分而傷血分。所以三焦  
膀胱之氣化流行而小便仍利。因血蓄下焦。故少腹

滿也。此證必當下之乃愈。不可餘藥者。言既無如狂喜忘。及身黃之證。不須以桃仁承氣。及抵當湯之快劑蕩滌之。但宜以抵當作丸。小其制而又分其勢。以緩下之。庶無太過之弊。而無傷於正氣也。

抵當丸方

水蛭

二十個  
熬

蟅蟲

二十五個  
去足翅熬

桃仁

二十個  
去皮研

大黃

三兩  
酒浸

右四味杵分為四丸。以水一升。煮一丸。取七合服之。時當下血。若不下者更服。解見抵當湯下

重編張仲景傷寒論證治發明溯源集卷之